



JUDICIAL **SYSTEM** MONITORING PROGRAMME
PROGRAMA MONITORIZASAUN BA **SISTEMA** JUDISIÁRIU

Sumáriu Kazu

Tribunál Distritál Oe-Cusse

Juñu 2014

Sumariu prosesu julgamentu kazu iha Tribunál Distritál Oe-Cusse Períódu Juñu 2014

Introdusaun

Iha fulan Juñu 2014, JSMP monitoriza kazu 12 hosi total kazu 30 ne'ebé julga iha iha Tribunál Distritál Oe-Cusse. Kazu 12 ne'ebe JSMP observa hotu-hotu klasifikadu nu'udar kazu krime violensia domestika 11 no kazu 1 seluk involve krime ameasa no la halo tuir obrigasaun alimentár hasoru nia oan nain tolu ho nia feen. Aleinde ne'e, tribunal mos omologa kazu 12 tanba parte sira konkorda atu dada fila fali sira nia kazu no kazu 6 seluk adia tanba sira la marka prezensa.

Kazu 12 ne'e JSMP observa, tribunal konklui ona nia prosesu no hot-hotu kondena ho pena multa. Nune'e, total 30 ne'ebe Tribunal Distrital Oe-Cusse konklui ona nia prosesu durante fulan Juñu hamutuk 24.

JSMP observa Tribunal Distrital Oe-Cusse kontinua fo prioridade ba kazu sira ne'ebe involve violensia domestika. Progresu ne'e bele nota hosi kazu sira ne'ebe tribunal julga maioria akontese iha inisiu tinan 2014 nian.

Maske iha progresu iha aspetu jestaun prioridade kazu violensia domestika sira, maibe JSMP iha notas preukupasaun balun iha aspetu sentensa ne'ebe tribunál aplika ba kazu violensia domestika sira. JSMP observa katak tribunal kontinua aplika pena multa ba kazu violénsia doméstika. JSMP rekomenda dalabarak ona katak pena multa la'os opsaun sentensa ne'ebé apropiadu ba kazu violénsia doméstika, tanba sei kontinua hatodan liutan vida ekonomia família nian.

JSMP fiar katak kuaze familia sira iha area rural infrenta problema seriu kona-ba osan ba sira nia vida lor-loron nian. Iha familia rural sira feto ka feen nu'udar autor ne'ebe servisu makas atu buka osan hodi finansia sira moris lor-loron nian. Tanba ne'e, wainhira osan ne'ebe sira hetan ho dezafiu oi-oin, selu fali ba estadu atu substitui arguidu nia hahalok krime ne'ebe komete hasoru lezada ne'e sei prejudika liutan sira nia moris no feto ne'ebe sai vitima kontinua sofre liu tan.

Bazeia ba realidade sira ne'e, JSMP prefere atu rekomenda ba tribunal hodi fo prioridade liu ba kompenzasaun sivil ba lezada duke pena multa ba estadu.

Tuir mai deskripsaun sumáriu julgamentu kazu kompletu :

1. Kazu krime ofensa ba integridade física simples ho natureza violência doméstica - Nú. Prosesu : 89/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$ 80,00

Iha 02 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade física simples ne'ebé involve arguidu AT hasoru nia feen (JP). Kazu ne'e akontese iha 27 Marsu 2014, iha Sub-distritu Pante-Makassar.

Ministériu Públiku akuza katak iha 27 Marsu 2014, maizumenus iha oras tuku 06:00 lorokraik, arguidu baku makas iha lezada nia matan karuk dala ida no kaer lezada nia fuk hodi riba lezada ba rai. Aktu ne' rezulta lezada sofre moras iha nia matan no bubu iha nia ulun. Kazu ne'e akontese tanba lezada la simu/hatan telefone wainhira arguidu kontaktu lezada hosi nia servisu fatin.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Durante prosesu julgamentu arguidu konfesa ninia hahalok ne'ebé nia komete hasoru lezada no deklarara katak nia arrepende ninia hahalok refere.

Iha alegasaun finál, ministériu públiku husu ba tribunál atu aplika pena multa ne'ebé adekuaudu no justu ba arguidu.

Entretantu defeza husu ba tribunál atu aplika pena multa ne'ebé adekuaudu tanba arguidu kolabora diak durante prosesu julgamentu nomos arguidu no lezada diak malu ona.

Tribunál konklui prosesu ne'e iha 12 Juñu 2014 no kondena arguidu ho pena multa US\$80,00 ne'ebé sei selu US\$1,00 kada loron durante loron 80 nia laran. Tribunál mós aplika pena alternativa loron 50 iha prizaun kuandu arguidu la kumpri pena multa refere.

2. Kazu krime ofensa ba integridade fízika simples ho natureza violénsia doméstika - Nú. Prosesu : 92/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$80,00

Iha 02 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé involve arguidu AM hasoru LC nu'udar arguidu nia feen, iha 03 Feveireiru 2013, iha Sub-distritu Passabe, Oe-Cusse.

Ministériu Públiku akuza katak iha 03 Feveireiru 2013, iha oras tuku 04:00 lorokraik, arguidu foti ai pedasuk ida baku iha lezada nia kotuk laran dala ida no ain kabun dala ida. Aktu ne'e rezulta lezada sofre bubu iha nia ain kabun no moras iha kotuk laran. Kazu ne'e akontese tanba lezada la kaer netik sira nia oan ne'ebé atu tuir arguidu ba iha arguidu nia maun nia uma.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Durante prosesu julgamentu arguidu konfesa faktu sira ne'ebe akuza ba nia no deklara katak nia arrepente ninia hahalok.

Iha alegasaun finál, ministériu públiku husu ba tribunál atu aplika pena multa ne'ebé adekuadu no justu ba arguidu. Alende ne'e defeza mos aseita ho alegasaun ministériu públiku tanba iha momentu ne'ebá arguidu dame malu kedas ho lezada.

Depois rona tiga alegasaun final hosi parte sira, tribunal marka fali agenda ba julgamentu iha 16 Juñu 2014, ho agenda leitura sentensa ba kazu ne'e. Tribunál konklui prosesu ne'e no kondena arguidu AM ho pena multa US\$80,00 no sei selu US\$1,00 kada loron durante loron 80 nia laran. Tribunal mos aplika pena alternative durante loron 50 iha prizaun kuandu arguidu la kumpri pena multa ne'ebe tribunal kondena ona arguidu.

3. Kazu ofensa ba integridade física simples ho natureza violência doméstica-Nú. Prosesu: 84/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$150,00

Iha 02 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade física simples ne'ebé involve arguidu JQ hasoru DR nu'udar arguidu nia feen. Kazu ne'e akontese iha 14 Feveireiru 2014, iha Sub-distritu pante Makassar.

Ministériu Públiku akuza katak iha 14 Feveireiru 2014, maizumenus iha oras tuku 20:00 kalan, arguidu basa dala tolu iha lezada nia hasan karuk no buti iha lezada nia kakorok. Aktu ne'e rezulta lezada sofre moras no bubu iha hasan no kakorok. Kazu ne'e akontese tanba lezada uza tiha osan US\$20,00, tanba ne'e, arguidu hirus no fakar tiha tua jerigen masa rua no kontinua baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violência Doméstica.

Durante prosesu audiensia julgamentu arguidu konfesa faktu sira ne'ebe akuza ba nia no deklarata katak nia arrepende ninia hahalok.

Iha alegasaun finál, ministériu públiku husu ba tribunál atu aplika pena ne'ebé adekuada tuir artigu 145 Kódigu Penal.

Entretantu husi defeza husu ba tribunál atu konsidera sirkunstansia atenuante sira hanesan arguidu manifesta nia arrendimentu, kolabora diak ho tribunál no arguidu ho lezada sira dame malu ona.

Iha 13 Juñu 2014, tribunál prezide fali leitura sentensa ba kazu ne'e no kondena arguidu ho pena multa US\$150,00 ne'ebé sei selu US\$1,00 kada loron durante loron 150 nia laran. Aleinde ne'e tribunál mós aplika pena alternativa loron 100 atu arguidu kumpri iha prizaun kuandu arguidu la selu pena multa refere.

4. Kazu krime ofensa ba integridade fízika simples ho natureza violénsia doméstika - Nú. Prosesu : 95/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$60,00

Iha 03 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé involve arguidu MU hasoru JQ nu'udar arguidu nia feen. Kazu ne'e akontese iha 04 Marsu 2014, iha Sub-distritu Passabe..

Ministériu Públiku akuza katak iha 04 Marsu 2014, maizumenus iha oras tuku 06:00 lorokraik, arguidu basa dala ida iha lezada nia hasan karuk no buti lezada nia kakorok. Aktu hirak ne'e rezulta lezada sofre moras iha hasan no kakorok. Kazu ne'e akontese tanba arguidu la satisfas ho lezada ne'ebé husu osan hodi hola bua malus ba ema sira ne'ebé mai hola sira nia naan karau.

Relasiona ho aktu hirak ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa hotu faktu sira ne'ebe akuza ba nia no deklara katak nia arepende nia hahalok ne'ebe nia komete hasoru lezada.

Iha alegasaun finál, ministériu públiku husu ba tribunál atu aplika pena multa ne'ebé adekuadu no justu ba arguidu. Alende ne'e, defeza mos konkorda ho alegasaun hosi ministériu públiku nomos husu atu tribunál fo justisa ba arguidu.

Iha 17 Juñu 2014, Tribunál Distritál Oe-Cusse konklui prosesu ne'e no kondena arguidu ho pena multa US\$60,00 ne'ebé sei selu US\$1,00 kada loron durante loron 60 nia laran. Aleinde ne'e tribunál mós aplika pena alternativa durante loron 40 iha prizaun se arguidu la kumpri pena multa refere.

5. Kazu krime ofensa ba integridade fízika simples ho natureza violénsia doméstika - Nú. Prosesu : 96/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzaan	: Kondena ho pena multa US\$90,00

Iha 03 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé involve arguidu BSM hasoru IT nu'udar arguidu nia feen. Kazu ne'e akontese iha 21 Feveireiru 2014, iha Sub-distritu, Pante Makassar.

Ministériu Públiku akuza katak iha 21 Feveireiru 2014, maizumenus iha oras tuku 19:00 kalan, arguidu tuku dala ida iha lezada nia ulun parte los. Lezada halai ba iha viziñu nia uma maibé arguidu duni tuir no buti lezada nia kakorok, rasta lezada nia liman to'o monu ba rai. Wainhira lezada monu ba rai arguidu sama iha lezada nia hasan. Aktu ne'e rezulta lezada sofre moras no kanek iha ain no liman los no kotuk laran. Kazu ne'e akontese tanba lezada bandu arguidu atu la bele uza be iha jerigen hodi haris, nune'e sira diskuti malu too arguidu baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa hotu faktu sira ne'ebe akuza ba nia no deklara katak nia arrepende ba ninia hahalok ne'ebé nia halo hasoru lezada.

Iha alegasaun finál, ministériu públiku husu ba tribunál atu aplika pena ne'ebé justu tuir artigu 145 Kódigu Penál kona-ba ofensa ba integridade fízika simples.

Entretantu hosi parte defeza husu ba tribunál atu fo justisa ba arguidu tanba arguidu hatudu arrependimentu, sira nian rua dame malu ona no arguidu kolabora diak ho tribunál.

Iha 19 Juñu 2014, tribuná l konklui prosesu ne'e no kondena arguidu ho pena multa US\$90,00 ne'ebé sei selu US\$1,00 kada loron durante loron 90 nia laran. Aleinde ne'e tribunál mós aplika pena alternativa durante loron 60 iha prizaun kuandu arguidu la selu pena multa refere.

6. Kazu krime ofensa ba integridade fízika simples ho natureza violénsia doméstika - Nú. Prosesu : 98/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$90,00

Iha 04 Juñu 2014, Tribunál Distritál Oe-Cusse julga arguidu EB ne'ebé komete krime ofensa ba integridade fízika simples hasoru LAS nu'udar nia feen. Kazu ne'e akontese iha 06 Abril 2014, iha Sub-distritu Pante Makasar, Oe-Cusse.

Ministériu Públiku akuza katak iha 06 Abril 2014, maizumenus iha oras tuku 02:00 lorokraik, arguidu tuku dala ida iha lezada nia tilun hun to'o lezada dismaia. Aktu ne'e rezulta lezada tenke lori ba hala'o tratamentu iha ospital. Kazu ne'e akontese tanba lezada husu perguntas barak kona-ba tua adat nian ne'ebé arguidu tau iha karon laran no rai iha sira nia kuartu laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa hotu faktu sira ne'ebe akuza hasoru nia no deklarata katak nia arepende ninia hahalok ne'ebé nia komete hasoru lezada.

Iha alegasaun finál ministériu públiku husu ba tribunál atu aplika pena multa ne'ebé adekuadu no justu. Entertantu hosi parte defeza husu ba tribunál atu aplika pena multa ne'ebé adekuadu ba arguidu tanba arguidu kolabora diak ho tribunal no arguidu no lezada mos dame malu ona.

Tribunal konklui prosesu ne'e iha 20 Juñu 2014, no kondena arguidu ho pena multa US\$ 90,00 ne'ebé sei selu US\$1,00 kada loron durante loron 90. Aleinde ne'e, tribunál mós aplika pena alternative durante loron 60 iha prizaun kuandu arguidu la kumpri pena multa refere.

7. Kazu krime ofensa ba integridade física simples ho natureza violénsia doméstika - Nú. Prosesu : 88/crime/2014/TDO

Kompozisaun Tribunál	: Singulár
Juís	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Afonso F. Gomes
Konkluzaan	: Kondena ho pena multa US\$60,00

Iha 04 Juñu 2014, Tribunál Distritál Oe-Cusse julga arguidu FS ne'ebé komete krime ofensa ba integridade física simples hasoru EF nu'udar nia feen. Kazu ne'e akontese iha 30 Marsu 2014, iha Sub-distritu Pante Makassar.

Ministériu Públiku akuza katak iha 30 Marsu 2014, maizumenus iha oras tuku 20:00 kalan, arguidu lanu no tuda lezada ho koku masa ida iha lezada nia kabun sorin los, foti meza plástiku nia ain hanehan iha lezada nia ulun no liman fuan los. Aktu hirak ne'e rezulta lezada sofre moras no liman fuan kanek. Aleinde ne'e, arguidu mós halo rahun vidru almariu roupa nian. Kazu ne'e akontese tanba arguidu lakontente rona lezada no arguidu nia inan koalía kona-ba atu ba hatama lezada nia belis ba umane (lezada nia inan-aman).

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira ne'ebe akuza ba nia no deklarata katak nia arrende ba ninia hahalok ne'ebé nia komete hasoru lezada.

Iha alegasaun final ministériu públiku husu ba tribunál atu aplika pena multa ne'ebé justu tuir artigu 145 Kódigu Penál.

Entretantu defeza husu ba tribunál atu aplika pena multa ne'ebé adekua ba arguidu tanba arguidu kolabora diak ho tribunal no sira nain rua dame malu ona.

Iha 20 Juñu 2014, Tribunál Distritál Oe-Cusse konklui prosesu ne'e no kondena arguidu ho pena multa US\$ 60,00 ne'ebé sei selu US\$1,00 kada loron durante loron 60. Aleinde ne'e, tribunál mos aplika pena alternativa durante loron 40 iha prizaun, kuandu arguidu la kumpri pena multa refere.

8. Kazu krime ofensa ba integridade física simples ho natureza violência doméstica - Nú. Prosesu : 83/crime/2014/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Kondena ho pena multa US\$ 60,00

Iha 04 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade física simples ne'ebé involve arguidu MJC (nu'udar lezada nia oan mane) no arguida MV (nu'udar lezada nia alin feto) hasoru lezada FC. Kazu ne'e akontese iha 24 Setembru 2013, iha Sub-distritu Pante Makasar.

Ministériu Públiku akuza katak iha 24 Setembru 2013, maizumenus iha oras tuku 08:00 dader, arguidu MJC tebe dala tolu iha nia inan ninia hirus matan, dala ida iha kabun no dala ida iha kelen ne'ebe kauza lezada monu ba rai. Kazu ne'e akontese tanba MV ne'e nu'udar arguidu nian inan ki'ik espalla informasaun ba comunidade katak arguidu nian buan (kaer aimoruk aat). Tanba ne'e arguidu sente moe hodi komete aktu hirak ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira ne'ebe akuza ba sira no deklara katak sira arrepende aktu hirak ne'ebe sira komete hasoru nia inan.

Iha alegasaun finál ministériu públiku husu ba tribunál aplika pena multa tuir artigu 145 Kódigu Penál.

Entretantu defeza husu ba tribunál atu tetu sirkunstansi atenuantes sira bazeia ba arguidu nia arrependimentu iha sala audiensia, kolabora diak ho tribunál no sira rasik dame malu ona.

Iha 13 Juñu 2014, Tribunál Distritál Oe-Cusse konklui prosesu ne'e no kondena arguidu MJC ho pena multa US\$60,00 ne'ebé sei selu US\$1,00 kada loron durante loron 60. Aleinde ne'e tribunál kondena pena alternativa durante loron 40 kumpri iha prizaun kuandu arguidu la selu pena multa refere.

Enkuantu ba arguida MV tribunál kondena ho pena multa US\$ 45,00 ne'ebé sei selu US\$ 1,00 kada loron durante loron 45. Tribunál mós aplika pena alternativa durante loron 30 i iha prizaun kuandu arguida la selu pena multa ne'ebé tribunál aplika ba nia.

9. Kazu krime ameasa no la halo tuir obrigasaun ba alimentár - Nú. Prosesu : 85/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Calisto Tout
Konkluzau	: Kondena ho pena multa US\$60,00

Iha 04 Juñu 2014, Tribunál Distritál Oe-Cusse julga arguidu JM ne'ebé komete krime ameasa nno la halo tuir obrigasaun alimentár hasoru MST nu'udar arguidu nia eis feen. Kazu ne'e akontese iha 16 Marsu 2013, iha Sub-distritu Nitibe, Distritu Oe-Cusse.

Ministériu Públiku akuza katak iha 16 Marsu 2013, iha arguidu ameasa lezada no abandona (la fo alimentasaun) ba lezada durante tinan ida. Arguidu kaben fali ona ho feto seluk.

Iha prosesu julgamentu arguidu konfesa no deklara katak nia arrepende ba nia hahalok hasoru lezada.

Ministériu Públiku akuza arguidu kontra artigu 225 Kódigu Penál kona-ba la halo tuir obrigasaun alimentár no artigu 157 Kódigu Penál kona-ba ameasa.

Iha alegasaun finál ministériu públiku husu ba tribunál atu aplika pena ne'ebé adekuada ba arguidu tuir akuzasaun.

Entretantu defeza husu ba tribunál atu fo justisa ba arguidu no husu atu tribunál tetu mós arguidu ninia arrependimentu ba ninia hahalok no arguidu nia kolaborasaun diak ho tribunál.

Iha 13 Juñu 2014, Tribunál Distritál Oe-Cusse konklui prosesu ne'e no kondena arguidu ho pena multa US\$60,00 ne'ebé sei selu kada loron US\$1,00 durante loron 60. Tribunál aplika mós pena alternativa loron 40 iha prizaun se enkuantu arguidu la kumpri pena multa refere.

**10. Kazu krime ofensa ba integridade fízika simples ho natureza violénsia dom'estika - Nú.
Prosesu : 87/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Afonso Fatima Gomes
Konkluzau	: Kondena ho pena multa US\$80,00

Iha 12 Juñu 2014, Tribunál Distritál Oe-Cusse hala`o prosesu julgamentu ba kazu krime ofensa ba integridade fízika simples ne'ebé komete hosi arguidu SB hasoru VB nu'udar arguidu nia feen. Kazu ne'e akontese iha 25 Feveireiru 2014, iha Sub-distritu Pante Makasar.

Ministériu Públiku akuza katak iha 25 Feveireiru 2014, arguidu tebe dala ida iha lezada nia hirus matan to'o monu ba rai. Arguidu kontinua buti no hanehan lezada nia kakorok. Kazu ne'e

akontese tanba arguidu no lezada diskuti malu kona-ba arguidu nia salariu ne'ebé nunka intrega ba lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira no deklara katak nia arrepende ninia hahalok ne'ebe komete hasoru lezada.

Iha alegasaun finál ministériu públiku husu ba tribunál aplika pena ne'ebe justu no adekuaudu tuir artigu 145 Kodigu Penal.

Entretantu husi parte defeza husu ba tribunál atu tetu mos sirkuntansia atenuantes sira hanesan arguidu nia arrependimentu no kolaborasaun diak ho tribunál durante prosesu julgamentu. Bazeia ba faktu sira ne'e, defeza husu tribunal atu fo justisa ba arguidu.

Iha 16 Juñu 2014, Tribunál Distritál Oe-Cusse konklui prosesu ne'e no kondena arguidu ho pena multa US\$80,00 ne'ebé kada loron sei selu US\$1,00 durante loron 80. Tribunál mós aplika pena alternativa durante loron 50 iha prizaun wainhira arguidu la selu pena multa refere.

11. Kazu krime ofensa ba integridade fízika simples ho natureza violénsia doméstika - Nú. Prosesu : 100/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Afonso Fatima Gomes
Konkluzau	: Sei kontinua prosesu

Iha 16 Juñu 2014, Tribunál Distritál Oe-Cusse hala'o prosesu julgamentu ba kazu ofensa ba integridade fízika simples ne'ebé komete hosi arguidu LS hasoru MB no EC nu'udar arguidu nia feen no oan. Kazu ne'e akontese iha 28 Agostu 2013, iha Sub-distritu Pante Makassar.

Ministériu Públiku akuza katak iha 28 Agostu 2013, maizumenus iha oras tuku 24:00 kalan, arguidu foti aisar baku dala rua iha lezada EC nia liman no tebe iha lezada MB nia matan sorin

los. Alende ne'e arguidu kaer lezada nia fuk riba ba rai, tuku iha ulun dala barak, no sama iha lezada nia kakorok. Aktu hirak ne'e rezulta EC sofre moras no MB sofre moras, kanek, oin metan no bubu. Kazu ne'e akontese tanba lezada na'in rua la fo han karau no hatan hasoru arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira no deklarata katak nia arrepende ba nia hahalok hasoru lezada na'in rua.

Iha alegasaun finál ministériu públiku husu atu tribunál aplika pena adekuada no justu tuir artigu 145 Kódigu Penál.

Entertantu defeza husu ba tribunál atu tetu didiak hahalok arguidu ne'ebé mak komete krime hasoru lezada no tetu mós sirkunstansia sira hanesan hatudu nia arrependimentu durante prosesu julgamentu.

Iha 30 Juñu 2014, tribunál konklui prosesu ne'e no kondena arguidu ho pena multa US\$75,00 ne'ebé sei selu US\$1,00 kada lora durante lora 75. Tribunal mos aplika pena alternativa durante lora 50 iha prizaun kuandu arguidu la selu pena multa refere.

12. Kazu krime ofensa ba integridade fízika simples ho natureza violénsia doméstika - Nú. Prosesu : 101/crime/2014/TDO

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Alfonso Lopes
Defeza	: Dr. Afonso Fatima Gomes
Konkluzau	: Kondena ho pena multa

Iha 16 Juñu 2014, Tribunál Distritál Oe-Cusse hala'o prosesu julgamentu ba arguidu MT ne'ebé komete krime ofensa ba integridade fízika simples hasoru TB nu'udar arguidu nia feen. Kazu ne'e akontese iha 07 Abril 2014, iha Sub-distritu Pante Makassar.

Ministériu Públiku akuza katak iha 07 Abril 2014, arguidu ho kondisaun lanu tuku iha lezada nia oin to'o lezada monu ba rai. Arguidu kontinua buti lezada nia kakorok no tebe iha lezada nia liman parte karuk no les lezada nia kotuk.

Aktu hirak ne'e rezulta lezada desmaia no sofre oin bubu, ran sai hosi tilun los, kanek iha liman no ran iha lezada nia kotuk laran. Kazu ne'e akontese tanba arguidu hemu tua hosi kalan to'o dader nune'e lezada baku dala ida iha arguidu nia ulun. Tanba hetan baku maka arguidu nervozu hodi baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa faktu sira hotu ne'ebe akuza ba nia no deklara katak nia arrepende hahalok

Iha alegasaun finál ministériu públiku husu ba tribunál aplika pena adekuada no justu tuir artigu 145 Kódigu Penál.

Entretantu husi parte defeza husu ba tribunál atu tetu mos arguidu nia arrpendimentu no tanba ne'e husu atu tribunál fo pena ne'ebé justu.

Iha 30 Juñu 2014, tribunál konklui prosesu ne'e no kondena arguidu ho pena multa US\$75,00 ne'ebé arguidu sei selu kada loron US\$1,00 durante loron 75. Tribunál mós aplika pena alternativa atu arguidu kumpri iha prizaun loron 50 kuandu arguidu la selu pena multa refere.

Sumariu kazu ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidus ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidus Amerikanu nia opiniaun".

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl